

HAKIJA ZAJMOVIĆ
Sudija Općinskog suda u Sarajevu

NAMIRENJE STEČAJNIH POVJERILACA

Iz odredbi o namirenju stečajnih povjerilaca, počev od člana 117. zaključno sa članom 130. proizlazi da Zakon o stečajnom postupku ("Službene novine FBiH" br. 29/03 od 30.06.2003. godine) predviđa tri vrste diobe, i to:

1. Djelimične diobe
2. Glavna dioba
3. Naknadna dioba

Postupak koji propisuje odredbe djelimičnih dioba, predviđen je u članovima počev od 117. zaključno sa članom 123. Zakona. Postupak za glavnu diobu propisan je počev od člana 117. pa do zaključno člana 127. Postupak naknadne diobe propisan je u odredbama članova od 128. do 130. Zakona o stečajnom postupku.

Ovaj dio stečajnog postupka pokušaćemo pojasniti postavljanjem pitanja koja bi mogla biti upitna u svakom članu počev od člana 117. do 130. Zakona o stečajnom postupku kojima je propisan postupak namirenja stečajnih povjerilaca i davanjem odgovora na ta pitanja na to kako ja tumačim ove zakonske odredbe i kako ih provodim u praksi. Neću postavljati pitanja i davati odgovore u pogledu onih odredbi za koje smatram da su jasne, jednostavne i mogu se shvatiti jednostavnim čitanjem zakonskog teksta.

Djelimična dioba

Član 117.

- Kada se najranije može vršiti djelimična dioba?
- Djelimična dioba se može najranije vršiti nakon održanog prvog ispitnog ročišta. (U praksi, smatram da će se djelimične diobe vršiti nakon prvog posebnog ispitnog ročišta, jer na tom ročištu imamo utvrdjenu

cjelokupnu tabelu, a prije tog ročišta teško da će i imovina biti unovčena.

- Kakva je uloga stečajnog sudije kod djelimične diobe?
- Stečajni sudija kod djelimične diobe samo odlučuje o prigovoru povjerilaca na diobni popis – član 123. st. 2. i 3.
- Šta sadrži saglasnost odbora ili skupštine za diobu i da li mogu raspavljati o diobnom popisu?
- Sadrži samo odluku o saglasnosti da se izvrši djelimična dioba i odredbu koji iznos prikupljene stečajne mase da se isplati povjeriocima.

Diobni popis

Član 118.

- Šta sačinjava **popis potraživanja** koja se uzimaju u obzir prilikom diobe?
 - a) u popisu potraživanja navode se utvrđena stečajna potraživanja iz tabele
 - b) potraživanja razlučnih povjerilaca koja se uzimaju u obzir.
- Šta sačinjava **zbir potraživanja** koja je stečajni upravnik dužan javno objaviti?
- Zbir potraživanja sačinjava:
 - a) priznata potraživanja svih isplatnih redova
 - b) sporna potraživanja za koja su pokrenute tužbe
 - c) potraživanja razlučnih povjerilaca ako su:
 - odrekli se prava na odvojeno namirenje
 - nije odvojeno namiren
 - unovčenje dobra koje služi za osiguranje nije dovelo do namirenja ličnog potraživanja.
- Koja je to stečajna masa koja je na raspolaganju za diobu?

- To je ona masa koja ostane nakon izmirenja obaveza prema povjericima stečajne mase iz člana 40. i te vrste troškova koji se predviđaju do okončanja stečajnog postupka.

Član 119. – Uzimanje u obzir spornih potraživanja

- Koji je zakonski rok u kojem sud utvrđuje da je prigovor stečajnog dužnika ili stečajnog povjerioca osnovan?
- Mislim da je ova zakonska formulacija nejasno iskazana te da je zakonodavac smatrao da će sud utvrditi da li je povjerilac u zakonskom roku pokrenuo parnicu na koju je upućen.
- Da li se zadržava sporni iznos ako je stečajni upravnik upućen na parnicu?
- Zadržava, jer stečajni upravnik zna za spor, pošto ga je on pokrenuo.

Član 120. – Uzimanje u obzir razlučnih povjerilaca

- Nema nejasnih pitanja.

Član 121. – Naknadno uzimanje u obzir

- Nema nejasnih pitanja.

Član 122.

- Koji je rok u kojem stečajni upravnik je dužan izvršiti promjene popisa koje su potrebne po osnovu člana 119, 120 i 121?
- To je rok od 18 dana nakon javnog objavljivanja zbira potraživanja i iznosa stečajne mase koji je na raspolaganju za diobu
- U kojem roku povjerioci mogu podnositi prigovor na diobni popis?
- U roku od 23 dana nakon javnog objavljivanja zbira potraživanja i iznosa stečajne mase koja je na raspolaganju za diobu.

- Da li stečajni sudija donosi rješenje kojim nalaže stečajnom upravniku da izvrši djelimičnu diobu nakon proteka roka za prigovor na diobni popis ili nakon konačne odluke o prigovorima?
- Sudija ne donosi nikakvo rješenje u tom pravcu jer je članom 117. propisano da će djelimične diobe vršiti po vlastitoj procjeni stečajni upravnik.

Glavna dioba

Član 124.

Smatram da se glavna dioba prema članu 124. ne može provesti bez rizika da povjerioci budu uskraćeni za pravo na podnošenje prigovora i eventualne žalbe na rješenje o odbijanju prigovora kao što to imaju mogućnost prema članu 123. Iz tog razloga smatram da i kod glavne diobe je potrebno provesti postupak počev od člana 118. sačinjavanjem diobnog popisa njegovim javnim objavljivanjem omogućavanjem povjericima da na njega istaknu prigovor, omogućavanje povjericima da ulože žalbu uslučaju odbijanja prigovora. Nakon provedenog tog dijela postupka, stečajni upravnik će sačiniti prijedlog za diobu, u kome mora unijeti sve promjene naložene prema članu 123. Nakon dostave tog prijedloga, prema članu 124. stečajni sudija će dati saglasnost za glavnu diobu i odrediti ročište za glavnu diobu.

- Da li povjerioci na ročištu za glavnu diobu mogu isticati prigovor?
- Mogu se isticati prigovori.
- Koje odluke može donijeti stečajni sudija na ročištu za glavnu diobu povodom istaknutih prigovora?
- Član 124. nije predvidio da sudija odlučuje o prigovorima, ali smatram da treba primijeniti sve odredbe iz člana 123.
- U kojim slučajevima stečajni sudija obavještava povjerioce čija potraživanja nisu u cjelini ili djelimično ispunjena da mogu ostvariti svoja potraživanja u redovnom izvršnom postupku, vraćanjem dokumentacije i izvoda iz diobnog popisa na koje je sudija dao saglasnost?
- Ovo je slučaj kada je stečajni postupak otvoren nad stečajnim dužnikom pojedincem.

- Gdje se objavljuje rješenje o davanju saglasnosti za glavnu diobu?
- Obavezno objaviti u "Službenim novinama FBiH" i na oglasnoj tabli suda.
- Da li je dozvoljen prigovor na završni račun?
- Prigovor je dozvoljen i o prigovoru treba odlučiti bez prava na žalbu (član 11.).

- Da li rješenjem o davanju saglasnosti na prijedlog diobe treba odlučiti o neunovčenoj imovini?
- Treba i uručiti je povjeriocima sa naznakom da oni postaju solidarni povjerioci.

Član 125. – Polaganje zadržanih iznosa

- Nema pitanja.

Član 126. – Rješenje o zaključenju stečajnog postupka

- Da li u rješenju o zaključenju stečajnog postupka treba staviti naredbu o brisanu stečajnog dužnika iz sudskog registra?
- Treba – na to obavezuje član 140. st. 3.

Naknadna dioba

Član 128.

- Šta u rješenju o odredjivanju naknadne diobe treba navesti?
 - Treba navesti da se **nastavlja postupak**
 - Imenovati stečajnog upravnika (po mogućnosti ranijeg)
 - Naložiti stečajnom upravniku da sačini diobni popis

Član 129. – Pravni lijek

- Nema pitanja

Član 130. – Provođenje naknadne diobe

- *Kakav se postupak provodi kod naknadne diobe?*
- Ako je iznos kojim se može slobodno raspolagati ili iznos dobijen unovčenjem naknadno pronađenog predmeta stečajne mase (unovčenje vrši sam stečajni upravnik) sačinice diobni popis, provesti postupak kao kod djelimične diobe i izvršiti diobu po tom diobnom popisu. Poslije diobe polaže račun stečajnom sudiji, nakon čega sudija donosi rješenje o zaključenju postupka.